



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-001-4/25**

Datum: **22.05.2025. godine**

«Agencija za vodno područje rijeke Save» Sarajevo rješavajući po zahtjevu JKP «VODOSTAN» d.o.o. Ilijaš za donošenje rješenja o vodnoj dozvoli za zahvatanje vode sa otvorenog vodozahvata na rijeci Misoči za potrebe snabdijevanja pitkom vodom potrošača na području općine Ilijaš, na osnovu člana 109. stav (1) tačka 1. Zakona o vodama («Službene novine Federacije BiH», broj 70/06) i člana 200. stav 1. Zakona o upravnom postupku («Službene novine Federacije BiH», broj 2/98, 48/99 i 61/22), donosi

R J E Š E N J E **o vodnoj dozvoli**

1. Daje se vodna dozvola korisniku JKP «VODOSTAN» d.o.o. Ilijaš za zahvatanje vode sa otvorenog vodozahvata na rijeci Misoči u svrhu obezbjeđenja potrebnih količina vode za piće stanovništva i privrede koje se vodom snabdijeva putem javnog vodovodnog sistema, a koji vodu zahvata iz rijeke Misoče putem «tirolskog praga» sa pratećim objektima pri čemu kapacitet zahvatnih objekata iznosi $Q=150$ l/s.
2. Vodna dozvola se daje na osnovu dostavljene dokumentacije, utvrđenog činjeničnog stanja tokom uviđaja izvršenog na lokaciji objekata i uz sljedeće uslove:
 - 2.1. Da korisnik predmetnih vodozahvatnih objekata iste održava u funkcionalnom stanju i koristi u skladu sa njihovom prirodom i namjenom te u skladu sa uslovima iz ove vodne dozvole.
 - 2.2. Da se obezbijedi stalni i sistematski pregled vode od strane ovlaštene laboratorije, te poduzmu sve potrebne mjere za osiguranje zdravstveno ispravne vode za piće. Kontrolu ispitivanja kvaliteta vode za potrebe snabdijevanja vodom za piće stanovništva mogu vršiti samo ovlaštene laboratorije u skladu sa članom 48. stav (3) Zakona o vodama («Službene novine Federacije BiH», broj 70/06).
 - 2.3. Da se, ukoliko se redovnim ili vanrednim analizama kvaliteta vode utvrdi da ova ne zadovoljava uslove vode za piće propisane Pravilnikom o zdravstvenoj ispravnosti vode za piće («Službeni glasnik BiH», broj 40/10, 43/10, 30/12 i 62/17), vodovodni sistem isključi iz upotrebe, odnosno blagovremeno i na adekvatan način obavijeste krajnji potrošači da voda nije za piće.
 - 2.4. Da se obezbijedi tehnička ispravnost ugrađenog mjernog uređaja za evidentiranje količina zahvaćene vode odnosno da se redovno vrši baždarenje mjerača protoka u skladu sa propisima o mjernim uređajima.
 - 2.5. Da se u cilju kontrole, evidencije i plaćanja količina zahvaćene vode vrši kontinuirano mjerenje količina zahvaćene vode. Evidenciju o mjerenju zahvaćenih količina vode vršiti u skladu sa Pravilnikom o sadržaju i načinu vođenja evidencije i dostavljanju podataka o količinama zahvaćene vode («Službene novine Federacije BiH», broj 83/08).
 - 2.6. Da se zahvaćena voda prečišćava na postrojenju za pripremu pitke vode lociranom na lokalitetu Karašnica, općina Ilijaš primjenom odabrane tehnologije koja će dati vodu za piće kvaliteta propisanog Pravilnikom o zdravstvenoj ispravnosti vode za piće («Službeni glasnik BiH», broj 40/10, 43/10, 30/12 i 62/17).
 - 2.7. Da korisnik vodozahvatnih objekata obezbijedi tehničku ispravnost ugrađene opreme na postrojenju za prečišćavanje vode kao i na objektima transportnog sistema (pumpe, vodomjeri, zatvarači itd.) te da se brine o čuvanju objekata i uređaja na njima od slučajnog ili namjernog oštećenja ili uništenja.
 - 2.8. Da se uredno vodi dnevnik rada u koji će se unositi podaci o postupku hlorinacije i potrošnji svih hemikalija.
 - 2.9. Da se vrši stalna dezinfekcija vode hlorisanjem kao i kontrola rezidualnog hlora u vodovodnoj mreži a u skladu sa Pravilnikom o zdravstvenoj ispravnosti vode za piće.
 - 2.10. Da se skladištenje hemikalija potrebnih u procesu dezinfekcije vode za piće vrši na propisan način.

- 2.11. Da se u toku važenja ove vodne dozvole kod nadležnih organa okončaju aktivnosti u cilju donošenja nove Odluke o zaštiti izvorišta «Mahmutovića rijeka» i rijeka «Misoča» u skladu sa važećim Pravilnikom o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva («Službene novine Federacije BiH», broj 88/12).
- 2.12. Do donošenja nove Odluke, sprovoditi zaštitne mjere i pridržavati se odredbi postojeće Odluke o zaštiti izvorišta «Mahmutovića rijeka» i rijeka «Misoča» donesene dana 14.12.2010. godine od strane Vlade Federacije BiH («Službene novine Federacije BiH», broj 87/10).
- 2.13. U cilju najstrožije kontrole prostora na kome su smješteni vodozahvatni objekti potrebno je isti na odgovarajući način obilježiti upozorenjem o zabrani neovlaštenog pristupa. Ogradu i ograđeni prostor oko vodozahvata potrebno je održavati što znači da je ovaj prostor potrebno kositi, uklanjati samoniklo šiblje i grmlje i isti obezbijediti i drugim mjerama fizičke zaštite i osiguranja, a što prvenstveno uključuje službu fizičkog obezbjeđenja na izvorištu (povremeni obilazak ili stalna posada), te alarm i druge mjere zaštite, ukoliko se to ocijeni potrebnim.
- 2.14. Da se na ekološki prihvatljiv način riješi trajno zbrinjavanje mulja koji nastaje na postrojenju za pripremu vode za piće, pri čemu se zabranjuje njegovo odlaganje na vodno dobro, javno vodno dobro, obale i korito vodotoka.
- 2.15. Vlasnik odnosno korisnik vodozahvatnih objekata je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje voda i nisu u suprotnosti sa uslovima iz ove vodne dozvole.
3. Vlasnik, odnosno korisnik predmetnih vodnih objekata je obavezan voditi propisne evidencije, te nadležnim organima dostavljati propisane obrasce u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada za korištenje vode i ispuštanje otpadnih voda.
4. U slučaju vanrednih situacija, havarijskih onečišćenja i drugih sličnih okolnosti čime bi bio ugrožen kvalitet voda obavezno izvijestiti nadležne organe i postupati po nalogu mjerodavnih institucija te preduzimati hitne mjere i aktivnosti na sprečavanju širenja onečišćenja i na otklanjanju uzroka onečišćenja.
5. Ukoliko prilikom upotrebe predmetnih vodozahvatnih objekata za koje se izdaje ova vodna dozvola dođe do promjene režima površinskih i podzemnih voda, a te promjene prouzrokuju štete ma kakvog karaktera, korisnik objekata je dužan uzroke štete otkloniti, a nastale štete nadoknaditi.
6. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
7. U ovoj upravnoj stvari plaćene su sve upravne takse.
8. Ova vodna dozvola, shodno članu 117. stav (1) i članu 129. Zakona o vodama se daje sa rokom važenja od 5 (pet) godina od dana pravosnažnosti ovog Rješenja.
9. Prije isteka važnosti ove dozvole korisnik je dužan da podnese zahtjev za izdavanje nove vodne dozvole.
10. Ovo Rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

JKP «VODOSTAN» d.o.o. Ilijaš obratilo se ovoj Agenciji dana 03.01.2025. godine sa zahtjevom za izdavanje vodne dozvole za zahvatanje vode sa otvorenog vodozahvata na rijeci Misoči za potrebe snabdijevanja pitkom vodom potrošača na području općine Ilijaš.

U provedenom postupku, uz zahtjev za izdavanje vodne dozvole dostavljena je i pregledana sljedeća dokumentacija:

- Kopija Rješenja o izmjenama podataka u sudski registar broj: 065-0-Reg-24-000697 izdatog dana 18.04.2024. godine od strane Općinskog suda u Sarajevu,
- Kopija Uvjerenja o registraciji poreznog obveznika izdatog dana 30.04.2024. godine od strane Porezne uprave Federacije BiH - Kantonalni porezni ured Sarajevo,

- Kopija Uvjerenja o registraciji/upisu u Jedinstveni registar obveznika indirektnih poreza broj: 04/1-17-1-UPJR/1-2917-2/24 izdatog dana 06.09.2007. godine od strane Uprave za indirektno-neizravno oporezivanje Banja Luka,
- Kopija Obavještenja o razvrstavanju pravnog lica prema klasifikaciji djelatnosti broj: 07-28-5-7766/24 izdatog dana 29.05.2024. godine od strane Službe za statistiku za područje Kantona Sarajevo,
- Kopija Odluke o zaštiti izvorišta vode za piće Mahmutovića rijeka i rijeka Misoča («Službene novine Federacije BiH», broj 87/10),
- Opći akt o održavanju, korištenju i osmatranju objekata vodoprivrednog sistema vodozahvata rijeke Misoče (broj: 29/19, decembar 2019. godine),
- Kopija Rješenja o urbanističkoj saglasnosti broj: 03-23-988/00 izdatog dana 22.06.2000. godine od strane Službe za prostorno uređenje, stambeno komunalne poslove i poslove obnove Općine Ilijaš (rješenje izdato za izvođenje radova na objektu vodozahvata sa dovodnim cjevovodom na rijeci Misoči, općina Ilijaš),
- Kopija Rješenja o odobrenju građenja broj: 03-23-1449/00 izdatog dana 04.12.2000. godine od strane Službe za prostorno uređenje, stambeno komunalne poslove i poslove obnove Općine Ilijaš (rješenje izdato za izvođenje radova na objektu vodozahvata sa dovodnim cjevovodom na rijeci Misoči, općina Ilijaš),
- Kopija Rješenja o vodoprivrednoj saglasnosti na projektnu dokumentaciju za izgradnju vodozahvata sa dovodnim cjevovodom na rijeci Misoči, općina Ilijaš broj: 07-06-25-43/2000 izdatog dana 14.07.2000. godine od strane Ministarstva privrede Kantona Sarajevo,
- Kopija rješenja o vodoprivrednoj dozvoli za korištenje vode iz vodozahvata na rijeci Misoči, broj: 07-06-25-40/2001 izdatog dana 21.02.2001. godine od strane Ministarstva privrede Kantona Sarajevo,
- Kopija Zapisnika Komisije za tehnički pregled izvedenih radova na objektu vodozahvata «Misoča» na rijeci Misoči u sklopu vodovoda Ilijaš od 25.12.2000. godine,
- Kopija Rješenja o odobrenju za upotrebu broj: 03-23-3959/00 izdatog dana 02.03.2001. godine od strane Službe za prostorno uređenje, stambeno komunalne poslove i poslove obnove Općine Ilijaš (rješenje izdato za izvedene radove na izgrađenom objektu vodozahvata na rijeci Misoči, općina Ilijaš),
- Pregledna shema vodovodne mreže Ilijaš — izvod iz projektne dokumentacije,
- Kopija Mišljenja o dostavljenoj projektnoj dokumentaciji broj: 13-635-2/00 od 08.06.2000. godine i broj: 14-1772-2/01 od 25.01.2001. godine urađenih od strane JP za «Vodno područje slivova rijeke Save» Sarajevo,
- Elaborat zona sanitarne zaštite za izvorište «Mahmutovića rijeka» i vodozahvat rijeke Misoča – usklađivanje sa zakonskim propisima urađen od strane «IPSA INSTITUT» d.o.o Sarajevo, august 2018. godine,
- Glavni projekat vodozahvata sa dovodnim cjevovodom Vodovod Ilijaš - faza hidrotehnika, urađen od strane «PROJEKT» d.d. Sarajevo, april 2000. godine (na uvid),
- Kopije Izvještaja o ispitivanju vode za piće (fizičko-hemijska i mikrobiološka analiza vode) urađenih od strane Instituta za zdravlje i sigurnost hrane Zenica,
- Dokaz o uplaćenju upravnoj taksi.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22), izvršen je obilazak predmetne lokacije u općini Ilijaš i tom prilikom je sačinjen zapisnik o izvršenom uviđaju broj: UP-1/21-3-40-001-3/25 od 14.05.2025. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

Vodovodni sistem urbanog dijela općine Ilijaš zasniva se na korištenju vode rijeke Misoče kao jedinog izvorišta koji je uključen u sistem. Koncept je zasnovan na tirolskom zahvatu izgrađenom 2000. godine putem koga se može zahvatiti do 150 l/s. Zahvaćena voda se nakon prolaska kroz pjeskolov i fine rešetke gravitaciono transportuje do pumpne stanice «Misoča» odakle se potisnim cjevovodom DN400 mm voda transportuje do postrojenja za tretman i nakon odgovarajućeg tretmana distribuira u mrežu.

Postrojenje je rađeno u dvije faze tako da je 1984. godine postojeći kapacitet postrojenja sa dotadašnjih 50 l/s povećan na 150 l/s dogradnjom svih potrebnih objekata — od koagulatora i taložnice do brzih samoispirajućih filtera i uređaja za dezinfekciju. Prema izjavi operatera vodovodnog sistema trenutno se zahvata oko 70 l/s, što pokriva potrebe za vodom konzumnog područja u nadležnosti JKP «VODOSTAN» d.o.o. Ilijaš. Na lokaciji postrojenja (brdo Karašnica) izgrađen je novi objekat filterskog postrojenja sa ukupno šest brzih filtera kapaciteta 100 l/s i rezervoari pitke vode zapremine 600 m³ i 3000 m³. Na ulazu u postrojenje je instaliran mjerač protoka i kontinuirano se prate određeni fizičko-hemijski parametri (monitoring kvaliteta sirove vode) u cilju urednog vođenja procesa tretmana vode. Procjenjuje se da se putem ovog vodovodnog sistema vodom snabdijeva oko 17000 potrošača. Dezinfekcija vode na Filter stanici «Karašnica» se vrši gasnim hlorom nakon njene filtracije prije nego se ista deponuje u rezervoarske prostore.

Redovno se rade mikrobiološka i fizičko-hemijska analiza vode (uz zahtjev dostavljeni izvještaji o ispitivanju urađeni od strane Instituta za zdravlje i sigurnost hrane Zenica).

Kao posljedica pojava periodičnih mutnoća pojavljuje se taloženje u potisnom cjevovodu kao i preopterećenost postrojenja za kondicioniranje. U tom smislu su urađene intervencije kojima se ublažio problem povremenih mutnoća, tako što su se u sabirno okno uvele vode iz drenažnih cijevi položenih duž desne obale rijeke Misoče uzvodno od zahvatnog praga. Osim izgradnje drenaža provedeni su radovi na uređenju korita rijeke Misoče u cilju smanjenja erozivnih procesa, pa samim tim i povećane mutnoće. U sklopu uređenja korita izvedene su i kaskade u koritu u cilju aeracije voda tj. poboljšanja sadržaja rastvorenog kisika.

Na području I zaštitne zone izvorišta rijeka Misoča nalaze se samo objekti i oprema koji su neophodni za rad izvorišta. To uključuje sljedeće objekte sa pripadajućom opremom:

1. vodozahvatni objekat u koritu rijeke Misoče,
2. objekti mehaničkog tretmana sa pjeskolovom i finom rešetkom,
3. objekti za zaštitu od voda na potezu 500 m uzvodno i 15 m nizvodno od zahvatnog objekta,
4. drenažne betonske cijevi DN 500 mm putem kojih se uvodi dio voda prikupljenih u aluvijalnom pojasu uz desnu obalu rijeke Misoče,
5. pješački most za pristup do pjeskolova i fine rešetke,
6. ograda sa ulaznom kapijom.

Upravljanje navedenim objektima i opremom obavlja se uz primjenu potrebnih mjera zaštite kako ne bi došlo do ugrožavanja izvorišta tokom rada u normalnim i vanrednim situacijama. Sam vodozahvat i njemu pripadajući objekti nalaze se u ograđenom krugu JKP «VODOSTAN» d.o.o. Ilijaš, što predstavlja I zaštitnu zonu. U cilju najstrožije kontrole ovog prostora, ova zona je na odgovarajući način ograđena i označena kako bi se spriječio pristup neovlašćenih osoba. Pored ograde, ovaj prostor obezbijeđen je i drugim mjerama fizičke zaštite i osiguranja.

Korisnik vodozahvatnih objekata, JKP «VODOSTAN» d.o.o. Ilijaš nije postupio u skladu sa tačkom 2.11. ranije izdatog Rješenja o vodnoj dozvoli broj: UP-I/25-3-40-563-6/19 od 22.01.2020. godine odnosno nije izvršeno usklađivanje postojeće Odluke o zaštiti izvorišta «Mahmutovića rijeka» i rijeka «Misoča» u skladu sa Pravilnikom o načinu utvrđivanja uslova za određivanje zona sanitarne zaštite i zaštitnih mjera za izvorišta voda za javno vodosnabdijevanje («Službene novine Federacije BiH», broj 88/12).

U toku je procedura oko usklađivanja postojeće Odluke sa Pravilnikom odnosno usvajanja nove Odluke o zaštitnim zonama izvorišta (urađen je Elaborat zona sanitarne zaštite za izvorište «Mahmutovića rijeka» i vodozahvat rijeke Misoča – usklađivanje sa zakonskim propisima od strane «IPSA INSTITUT» d.o.o Sarajevo, august 2018. godine).

Na osnovu utvrđenog činjeničnog stanja i dostavljene dokumentacije, a u svrhu ostvarivanja prava na vodu drugim korisnicima kao i održivog korištenja voda, podnosiocu zahtjeva, JKP «VODOSTAN» d.o.o. Ilijaš, su ovom vodnom dozvolom u tački 2. dispozitiva rješenja, propisani uslovi kojih se dužan pridržavati prilikom korištenja predmetnih vodozahvatnih objekata u skladu sa članom 48., 64., 66., 116. i 128. Zakona o vodama («Službene novine Federacije BiH», broj 70/06) i članom 12. i 13. Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22).

Tačka 3. dispozitiva Rješenja je propisana u skladu sa tačkama 4. i 27. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opće i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16) i Odlukom o visini posebnih vodnih naknada («Službene novine Federacije BiH», broj 46/07, 10/14 i 03/16).

Na osnovu provedenog postupka konstatuje se da je podnosilac zahtjeva, JKP «VODOSTAN» d.o.o. Ilijaš, ispunio minimum uslova za izdavanje vodne dozvole za zahvatanje vode sa otvorenog vodozahvata na rijeci Misoči u svrhu obezbjeđenja potrebnih količina vode za piće stanovništva i privrede općine Ilijaš koje se vodom snabdijeva putem javnog vodovodnog sistema, te je riješeno kao u dispozitivu ovog Rješenja.

Podnosilac zahtjeva uplatio je posebne troškove prema Zaključku ove Agencije broj: UP-1/21-3-40-001-2/25 od 09.05.2025. godine.

Podnosilac zahtjeva je uplatio upravnu taksu u iznosu od 70 KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10, 43/13 i 98/17).

Uputa o pravnom lijeku:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obradivač akta:

Nermina Hodžić, dipl.inž.građ.

Po ovlaštenju
Rukovodilac sektora za izdavanje
vodnih akata



Nihad Pezo
Nihad Pezo, dipl.inž.građ.

Dostaviti:

- JKP «VODOSTAN» d.o.o. Ilijaš
ul Banovac br 1A, 71380 Ilijaš
- ⊖ AVP, ISV – Vodna knjiga
- Sektor 50,
- Sektor 40, arhiva
- Oglasna ploča – AVP Sava